

# Ils purs da muntogna gudognan

Debatta parlamentara davart la politica agrara

CUN CUSS. NAZ. HANSJÖRG HASSLER  
HA DISCURRÌ LUCAS DEPLAZES / ANR

■ **Per ils onns 2014–2017 vul il cussegl federal metter a disposiziun dal puresser la medema summa sco ils ultims onns, numnadamain 13,67 milliardas francs.** Cun la nova politica agrara inziesscha il cussegl federal dentant ina nova via. El vul dismetter las contribuziuns directas per las vatgas en favur da la tgira e da la proteziun da la cuntrada e dal bainstar dals animals. En questa sessiun ha il cussegl naziunal deliberà la fatschenta ed approvà gros modo las propostas dal cussegl federal. La Partida liberaldemocrata (pld) ha sustegnì serrà ses cusseglier federal *Johann Schneider-Ammann* e gidà ensemen cun la sanestra a dumagnar l'opposiziun da la pps e da la pcd. Cun 100 cunter 80 vuschs ha il cussegl naziunal acceptà la midada. Durant la sessiun da december proxim vegn il cussegl dals chantuns a tractar la fatschenta.

*Hansjörg Hassler* (pbd/GR) ha gi la difficila rolla da pledader da la cumissiun. L'anr ha vulì conuscher ses parairai davart il resultat da la debatta, spezialmain las consequenzas per il purs da muntogna.

***Hansjörg Hassler, essas Vus cuntent cun il resultat da la debatta en il cussegl naziunal?***

Gea, jau sun per la gronda part satis-

fatg dal resultat. La nova politica agrara va en ina buna direcziun. Il cussegl naziunal ha per la gronda part suandà la politica dal cussegl federal. Jau crai che nus avain mess ils dretgs accents per l'avegnir da l'agricultura.

***Cun la nova politica datti ina midada da direcziun tar l'agricultura. Na munta quai betg ina midada da paradigma che ha evocà ina massiva opposiziun?***

Ma, uschè gronda è la midada tuttina betg. Facticamain vegnan las contribuziuns per ils animals betg dismessas dal tut. Ils purs survegnan vinavant contribuziuns, dentant en ina altra maniera, per exempel per laschar liber la biestga e la pavlar cun fain e pastg. Plinavant datti supplements per toc per metter la biestga ad alp. Las contribuziuns per animals han intimà ils purs da tegnair memia bler vatgas, quai che ha gi per consequenza ina surproducciun da latg e da charn. La fiera n'ha betg pli acceptà l'augment da la producciun, il pretsch dal latg è sa sbassà massivamain. Quai ha dà problems ch'ins sto prubar uss da cur-reger.

***È il dumber da vatgas s'augmentà talmain?***

Quai n'è betg stà sulet il problem dal dumber. S'augmentà è il quantum da

latg en in svilup permanent. Cun las novas mesiras sperain nus ch'i vegnia procudì damain latg.

***Tar questa revisiun gudognan principalmain ils purs da muntogna.***

Ils purs da muntogna vegnan sustegnids pli ferm cun quella nova reparti-tziun dals pajaments directs. Quai è er stada ina clera finamira dal nov sistem. Ins sto vesair che fin uss cumportan las entradas dals purs da muntogna la mesadad dal gudogn dals purs da la Bassa. La nova politica agrara curregia uss quella situaziun.

***Va la midada sin donn e cust dals purs da la Bassa?***

Ins na po betg dir quai uschia. Da nov datti er meds en favur dals purs da la Bassa. Ma, sch'ins fa correcturas èsi cler ch'i dat tals che gudognan ed auters che perdan.

***L'Uniun purila svizra ha – ensemen cun la pps – fatg gronda opposiziun cunter la midada. Ston ins uss quintar cun il referendum?***

Na. Quai dat nagin referendum. Il privel da sperder per tuts è memia grond. Jau sun persuas ch'il pievel sustegna la nova politica agrara che ha era per mira da proteger nossas cun-tradas e promover la biodiversità.



Ils pledaders da la cumissiun per la politica agrara Hansjörg Hassler (pbd GR) amez e Christoph Darbellay (pcd VS) fan printgas cun cusseglier federal Johann Schneider-Ammann sin la debatta davart la politica agrara.